




第參

特別  
イ 4  
3152  
84



續關西游草

才雅  
書



14  
3152  
84

茲游未滿一月而所歷數百里途多勝境境存古蹟續  
關西游草之作予豈徒爾哉先是一年予有韓山之  
行其詩題曰槿域游草友人伊東君聿水將捐貲以刻  
會朝鮮總督府亦欲刊之於其地懇請數次因舉稿付  
之聿水乃爲刻此集顧曩者詩鈔乙籤之成其貲實係  
聿水所辦而今復有此舉不獨於斯文有篤好其厚于  
友誼蓋當世所罕見仍弁卷首以誌弗諉之意云爾  
癸亥臘月天隨記



忽忽上車便趁程。應是午夜酒醒後。羈旅之苦吾未知。  
笠屐逍遙隨處宜。最喜一身無檢束。絕似飛鳥任所之。

望岡山城弔浮田秀家

石山宜連壁。旭河堪作濠。雉堞煙消處。譙樓百尺高。烏  
城屹當西州路。龍盤虎踞金湯固。誰專城居擁大封。可  
憐公子是紈袴。關原一敗志難成。南島炎瘴寄餘生。當  
時城中皆鼠竄。焉得歸來此爭衡。劫後山河三百歲。金  
吾懦豎今安在。吁嗟乎慷慨赴義猶男兒。故國神游魂  
不餒。

曉出岡山赴豪谿途上作

樹影團團遠近齊。曉煙搖曳四山低。微風吹度野田綠。  
月落叢祠啼竹雞。

高松城址

足守河漲急于潮。濁浪山立盪麗譙。自古水可亡人國。  
猴郎豪氣衝九霄。昨請主公來督戰。無端俄傳京洛變。  
城陷且喜我武揚。三家使至笑相見。絕代霸才善乘機。  
舉鞭東向疾如飛。乃臬豎子朝天闕。從是海內服英威。  
城墟今有炊煙上。幾處桑柘秋色爽。環之營壘跡可尋。  
蛙鼻岡頭草木長。君不見修理左近皆人豪。銜命東陞  
擁旌旄。報仇之義却如忘。輸著此公聲譽高。

豪谿

通幽一徑往如還。杖屐逍遙水石寰。竦峙猶爭高下勢。  
幾多青峭四圍山。雨後林巒爽氣饒。路從澗畔入岩堯。我來試作蘇門嘯。  
峭壁攢峰乍動搖。石徑高低林下分。人家水碓隔谿聞。亂峰齊著晴暉色。  
一抹青霞間紫雲。何來秋氣捲松濤。短屐長筇不厭勞。行到谿迴峰轉處。  
巍然一柱插天高。撥雲飛步躡天梯。老樹荒巖罨畫谿。愛個茅亭殊敞豁。

驀然脚底一禽低。

幽僻由來秀氣鍾。雲嵐匝匝護仙蹤。怪奇百出無重複。  
看自圭峰到劍峰。

峽樹重重谿水奔。數家雞犬別乾坤。倚天千仞蒼崖底。  
洞口雲深石作門。

巖花欲碎露猶滋。陰壑生風午日遲。橫嶺側峰頻變化。  
迴瞻橋上立多時。

蘿磴松崖嵐翠凝。清秋絕頂曲欄凭。招提已歷恆河劫。  
無復雲巖入定僧。

物外游蹤泉石盟。高人軼事耳頻傾。鬼神呵護堪千古。

鳳翥鸞翔筆有精。

絕幽鑿險苦相尋。終古風煙洞壑深。貌得大癡真面目。

江湖名播紀春琴。

寂歷空山過客稀。行吟半日足忘機。向人且詫詩囊重。裹得煙嵐幾片歸。

豪谿之游。津下蘆舟爲東道。歸憩滴翠樓。酒間賦似。

遠客臨荒路。低徊悽欲愁。停車逢好友。聯屐作同游。群嶂排雲出。亂泉衝石流。谿頭茅店古。沽酒且稽留。幽探償夙志。好景遣羈愁。夢寐久相憶。谿山初一游。千

峰石皆峭。萬壑水爭流。塵累如拋得。何妨此滯留。

次三好敬堂見似詩韻

機外

清幽不許俗塵侵。猿鳥引人涼滿林。山色當欄妍似畫。松聲入戶韻于琴。夙將濟勝抵公事。敢道賦詩稀賞音。好是谿亭卸裝了。與君撒手度雲岑。

此間泉石亦新知。疇昔緣慳歲月馳。水複山重原擅勝。神剗鬼刻更增奇。高吟只在開尊後。逸興無如拄笏時。絕境盤桓消半日。要將好景入吾詩。

後樂園偶得

士女嬉游每作群。名園絕勝久相聞。涼生濠上城陰直。

秋拂林梢塔勢分。日朗中庭異禽集。露晞一徑雜花薰。  
晴日浮

微風度

緬懷芳烈此經始。金谷玉津何足云。

一泓秋水鑒禪心。

帝釋

地僻村墟小。炊煙木末生。谿聲分遠近。山色變陰晴。神  
鬼虛堂邃。丹青畫壁明。幽尋終不飽。更向石梁行。

白雲洞

蒼崖路盡處。洞口生白雲。驀地風鼓盪。日色慘欲曛。隨

手雲可擘。襟袖皆氤氳。我願遐學去。笑伴雲中君。

鬼橋

帝釋之水頻奔馳。流下急灘疾於矢。衝波逆折巨靈瞋。  
穿破石壁終靡已。異哉其跡類斜梁。谿澗大壑此中央。  
連延不斷穹窿勢。蟠竦倚空千尺長。茲來諦觀窮殊狀。  
欲就橋上試高唱。挽蘿捫葛獨躋攀。足躡瓊瑤神方王。  
橫槎覆版豈同科。一路坦夷牛馬過。須比欄楯迭承翼。  
兩邊列植喬樹多。日色微暈秋氣爽。脚底飛湍似雷響。  
天風吹落溼嵐重。濛濛水霧相摩盪。天台石梁久擅名。  
方輿鬼橋一夜成。曾由畫圖看髣髴。焉得東西競輸贏。



淑靈磅礴闢奇勝。果然名實恰相稱。不辭長途歷險艱。  
游陟半日縱清興。真個洪鈞能起予。俯仰幾回瞪目餘。  
描寫誰矜筆力壯。前有杏坪後朗廬。君不聞二尊當日  
奉天敕。行度浮橋暫止息。瓊矛直探滄溟深。鋒滴所凝  
卽成國。又不聞祖龍暮年海上游。欲觀日出意未休。何  
者造橋爲驅石。鞭之東首奈血流。我與風塵絕拘繫。恍  
然魂馳鴻荒世。却笑海神竟無功。莫是媚人事暴戾。停  
筇浩歌氣更雄。咫尺碧霄路可通。安得羅家道士攜手  
去。移步銀橋到月宮。

過山口

留爪鴻城記昔緣。江山無恙曉晴前。始知羈旅催人老。  
來往風塵三十年。

長門峽紀勝六首

峽口屹石門。蒼煙自包孕。洞壑窅以深。峰勢莽綿互。丁  
字二流會。上下灘聲應。潭間龍氣浮。終古頑陰暝。登頓  
穿犖确。客與雲爭徑。棧閣相鉤連。引人漸入勝。巖花散  
有香。遠風涼不定。曉禽哢好音。瑣碎亦可聽。清境延佇  
宜。孤賞意頗稱。寧厭跋涉勞。谿山堪縱興。

石筍兀當前。拔出青冥上。雄奇偏作勢。離立絕依傍。面  
面鐵光明。爽氣此醞釀。初日爛射之。縷縷紫煙颺。餘脈

長蜿蜒。鬪險不相讓。巨靈所鏤刻。一一窮殊相。路盡沙  
岸頭。滌洞奔流漲。琤琮如曼玉。虛籟亦搖漾。步步觸目  
佳。濟勝更前向。偉哉活畫圖。荆關輸奇艱。  
仄徑躡屐行。捫蘿偏艱苦。紆曲緣危崖。險夷無定所。亂  
峰碧四圍。缺處茅亭補。此時谿煙斂。好景快先睹。秋水  
清無底。臨流首爲俯。纖鱗若空游。個個堪細數。其上魚  
路斷。湍勢疑發弩。夾岸嘉樹繁。時著異禽語。襟懷殊暢  
適。賴有賞心侶。賈勇更趁程。戴笠日卓午。  
四山迴合處。竹樹蔚作林。風過群籟靜。繼之一蟬吟。步  
度橋獨木。行行樵路深。雲氣不離石。澗畔生微陰。泉源

微風

於

吹

水幽咽。韻於笙匏音。竭來祛歎蒸。涼氣吹上襟。畫僧昔  
所宅。高隱跡可尋。游藝遺塵世。何管歲月侵。眷言殷仰  
慕。邱壑無古今。我亦鑿止水。始悟清淨心。  
晚尋金鄉谿。萬巖瘦如削。斜日山氣深。紫翠紛交錯。隨  
步趣有加。履險輒驚愕。崖腹洞門邃。分明鬼工鑿。脚底  
雷霆轟。水石怒相搏。群流趨就下。洪波漲澗壑。當其峽  
勢窮。巨瀑自天落。風挾濃霧吹。飛沫濺林薄。雖無豺虎  
虞。言歸移芒屨。餘輝樹罅明。荒塗辨約略。  
峽天易昏黃。巖頂逗返景。彩翠猶照爛。飛霞一抹永。須  
臾暝色至。遠近濛相併。倦禽旣歸盡。煙霧罩修嶺。林葉

帶風涼。夕露瑩且冷。入夜萬籟暗。泉溜破寂靜。此心涉  
高曠。塵事都驅屏。何須趁偃松。苦心尋丹井。超然觀物  
理。坐久發深省。谿樓待月生。欄角秋氣警。

長門峽歌。用諸家唱和韻。寄高島九峰北海二老。

觀水每擬窮其源。峽天蹙處青倒奔。朱門華屋非我願。  
真境須與靜者論。二妙名在機雲上。桑梓地僻迴亂嶂。  
會心豈啻濠濮間。試問少時幾相訪。勝情不負好山川。  
闡幽快著祖生鞭。名兄詩與令弟畫。能遣佳景天下傳。  
我亦平生愛游覽。杖屐遠來躡絕險。灘聲如雷崖勢危。  
四面嵐光綠于染。君家賞鑒爭不得。可比紫氣張華識。

怪底蜻洲西盡頭。山重水復別成國。

疊韻寄國分青崖。

詩思湧如流水源。幾人聯鑣共競奔。靈光巋然堪欽仰。  
平生尊酒許同論。千瀑洞口龍潭上。知君卸笠揖青嶂。  
得意拾句屐躡雲。迂路金鄉亦尋訪。今我行邁隨長川。  
紀游輸君著先鞭。乃避雷同入剗刻。吟到太苦厭浪傳。  
群豎多未經勝覽。區區趁韻語寒險。僥倖附驥偷聲名。  
例是因汚而成染。筆有千秋非苟得。斯道仍要高人識。  
始作俑者無後乎。怕見荒蕪遍詩國。

阿武川舟中

舟從天上落。山向浦頭奔。斜日低平楚。炊煙罩一村。傍汀風不定。出峽水初渾。回首仙源遠。又聞城市喧。

山田別池田長谷次韻率賦

喜

一汀疎柳帶秋聲。水國晴開夕照明。分手憐君歸路遠。暮雲天末指烏城。

霸城客夜寄內

天上佳期幸不違。人間却覺遠游非。可無卍字蜘蛛網。拖向閨中著苧衣。

欲游青海島終不果乃賦此

分明鼇背島煙青。絕勝居然毓秀靈。帆外有天成遠勢。

磯頭無石不奇形。日烘水府蜃樓幻。潮打洞門龍氣腥。且願他時風力便。笑招海若此揚舲。

秋吉瀧穴

洞口蛟潭黑。其下瀑流決。懸棧百尺長。緣崖巧架設。炬火導客行。相顧戒蹉跌。奔湍忽當前。沙岸路阻絕。刺舟始可渡。前程更曲折。仙蝠乘暗飛。窈窕乾坤別。鍾乳所凝成。形態皆奇譎。無復斧鑿痕。宛與神工埒。綏綏瓔珞垂。閃閃刀戟掣。旛幢輕搖颺。蓮豆儼排列。石杵可撞春。金柱矜瓌傑。鱗爪龍身全。青黃虎文綴。巨房容萬人。四壁皜而潔。彷彿水晶宮。虛明光瑩徹。仄行千餘步。陰寒

劇清切。悄然回踵處。泉聲竇底咽。大滌與太真。何由漫  
旌揭。羊門與馬戶。亦當愧淺劣。天眷古長門。此通地肺  
穴。雲雨中潛藏。元氣莫漏泄。

尾道別福田眉仙

千里霸城路。與君聯屐過。游蹤一以眺。吟興果如何。煙  
襯群山曙。天低遠水波。鶴灣秋到早。別恨不堪多。

橋本海鶴宅觀賴山陽真蹟耶馬谿圖詠史樂府

二卷賦此爲謝

君家竹下翁。翰墨獨娛老。儒雅風骨高。何人不傾倒。夙  
知賴子成。車笠交情好。儲藏真蹟多。可以資研考。耶馬

谿山奇。杖屨躬探討。胸中邱壑在。健毫試一掃。渲染無  
匠氣。巖巒訝天造。記文尤清雋。勝名播世早。樂府晚年  
作。李尤輸才藻。論斷寓勸懲。篇篇不枯燥。寫之首尾全。  
得意歸狂草。走蛇出深叢。游絲裊晴昊。藝備尋名門。零  
落傷懷抱。奕世稱素封。齊家定有道。書畫滿一船。慎重  
當共保。既爲希代珍。卽是天下寶。

過阿伏菟岬下

前年此岬頭。振衣亭立發長謳。寥廓晴開淨如拭。水明  
山媚繪新秋。今日此岬下。風帆勢驕疾于馬。沙際白鷗  
驚且飛。涼透客衫潮氣瀉。大悲傑閣擅奇工。廻廊幾間

盤虛空。但道好景妙於畫。亦因所居觀不同。無邊滄溟  
漾紅日。煙消取次洲渚出。誰倚危欄學故吾。俯瞰千仞  
鮫人室。

舟入多度津。三谷象雲來迎。導予至丸龜。共宿玉  
川樓。用前年唱和韻賦似。

五過讚州地。熟路固無艱。尊酒逢良友。風煙似故山。亂  
蟬當晚急。遠樹帶秋閒。明日宜聯轡。半天霞綺斑。

三宅素菴說田桂堂來過酒間分韻各賦

玉女投壺處。英雄失箸時。雷聲劈山出。雨脚挾風馳。薄  
夜燈初上。新涼骨自知。高樓呼酒到。勝宴可無詩。

雲外

志度寺

淨地晝無暑。移屐向上方。雛僧漫饒舌。緣起素荒唐。幽  
宮波底杏。毒龍太猖狂。完璧歸亦晚。一死報吾郎。莊嚴  
開紺宇。樓閣金碧光。鐘鼓轟晨昏。祇樹嵐翠涼。屋島青  
當面。秋到舊戰場。奔潮盪斜照。海山晚蒼蒼。

平賀鳩谿故里

驩虞無事久。文武重門闕。所以有爲人。蓬蒿吞恨歿。出  
身吏胥家。天才頗英發。削籍賦遠游。素志在簪笏。夙講  
物產學。究理常矻矻。巧智奪化工。精華長不竭。寧堪居  
賤貧。徒爾消歲月。時屈處士尊。權門試干謁。悍馬誰駕

馭歷塊誤顛蹶。睥睨古今盡。滿胸氣鬱勃。諷世機鋒銳。  
文章亦傲兀。末路繫囹圄。空瘞千金骨。桑梓存故居。招  
提賸斷碣。精魂所憑依。遺蹤未湮沒。縱獲歷代名。終生  
唯倉卒。大材難爲用。馨香易銷歇。

題竹林上人墨竹

蕭郎絕技固無倫。後來文同妙入神。宋楊王夏鳴明代。  
濃澹表裏巧寫真。竹林上人矜多藝。就中畫竹尤孤詣。  
擺脫死法出清新。乃與前賢成默契。个字雲煙介字風。  
對此便覺萬緣空。畫禪一理墨三昧。何怪落筆抵化工。

琴林公園

晴波涵孤嶼。閒鷗任浮沈。滿汀白浩浩。平沙三尺深。碧  
落含顛氣。蒼靄接遠岑。一徑導人入。鬱鬱喬松林。如蛟  
龍騰擲。擎雲海山陰。如戈矛攢簇。衝天柯條森。忽值驚  
風過。鼓鬣齊長吟。颼颼響不斷。靜聽韻于琴。松釵紛鋪  
地。早秋涼上襟。坐憩占清境。悠然愜素心。佳人隔千里。  
跂步難招尋。安得託所思。傳此瑤華音。

栗山堂

寬政三博士。先生班其首。自少蘊蓄深。矧兼才力厚。西  
洛初遷喬。嚶嚶鳥求友。儒雅振名聲。輿望等山斗。起應  
霸府辟。乃在知命後。異端可排擊。五鬼皆却走。泮宮制

度全。教人懇開誘。學風爲一新。功績長不朽。有時參幕  
議。經世展抱負。言行道亦行。何必帶紫綬。玷壇仰主盟。  
共推射鵬手。聲律繼中晚。文章趁韓柳。故宅栗山陽。四  
面帶林阜。雞犬一村幽。煙嵐通窓牖。遺像宛如生。清高  
誰相偶。目斷玉樓遙。翻驚歲月久。

鹽江浴舍題壁

峰巒環抱處。泉石別成鄉。秋簟通山氣。風簾盪午涼。微  
吟心自樂。孤坐日偏長。暝色生林杪。忽聞蟬語忙。  
步到野橋頭。涼天暮靄收。燈痕明在水。松籟颯成秋。猿  
鶴如同宿。雲山足勝游。長安千里遠。絕境喜淹留。

土柱

三山鍾秀靈。六嶽矜峯巒。卅勝難細寫。何者掌祕鑰。千  
帽拔地峻。絕谷一寥廓。土筍森排比。洪鈞巧雕鑿。中央  
瑞穗洲。天柱矗如削。其餘形貌殊。兔起而鶻落。清淨密  
巖土。層塔傍雲脚。瀟灑神仙境。洞門看隱約。蓬萊屹當  
面。日月照樓閣。滄溟遙接空。波濤趁蛟鱓。角立無雍容。  
高下更紛錯。怪詭那能狀。瞠目輒驚愕。風雨所洗熨。泥  
滓難依著。團沙凝亦堅。黃土併屬絡。圓山與步頂。宛然  
得崖略。既是飽醇醪。誰復思糟粕。停筇縱觀久。疊足頻  
歡躍。林莽淒以風。蒼煙籠大壑。探盡天下奇。遠游殊不



惡一舒曠士懷。莫言賦分薄。

大步危

峽天窄於甕。蹇步傍山背。峭壁水光翻。其下一谿耳。衆流所滙合。渦旋無定止。潭沱澄碧深。宛與瑤璃比。條然發興奇。游懷鬱以企。一舸截漣漪。顧盼棹頻弭。屹峯如豎屏。兩岸纔尺咫。秀削勢更壯。巨巖紛竦峙。石皴自參差。斧劈殊恢詭。百獸爭向背。命名巧相擬。想像幽宮底。萬怪聚成市。破蘚痕縱橫。蛟涎流有泚。風物尤懸殊。忽過七八里。棄舟仍夷猶。獨立河之涘。矯頸望去程。曖曖午嵐紫。木末行人小。崖腹路逶迤。山水含清暉。都在畫

圖裏。崇睇應接忙。臨險魂爲褫。終古元氣鍾。谷神長不死。何當緩我行。攬勝暫在此。

踰猪鼻嶺

曲曲羊腸車屢停。撼林蟬語不堪聽。谿頭日昃奔泉白。天末雲開亂嶂青。久矣世途閱艱險。莫教客子嘆飄零。黃昏出峽驚魂定。秋色遠連長短亭。

金陵別三谷象雲七疊韻

爲感平生誼。別離心孔艱。一旬聯野屐。幾處度雲山。靜夜琴尊在。清秋林壑閒。重逢應有日。莫使淚痕斑。

芳山

風雲終古護山河。龍馭不回遺恨多。每遣詞人傾涕淚。  
延元陵下四經過。

大峰紀游

嶺背一徑長。詰曲到天際。歷歷萬陂陀。高下供睥睨。林  
葉露未晞。千山繪秋霽。青縹而白繞。游目忽遮蔽。石氣  
溼不飛。洞谷互連綴。窅深固難量。泉聲咽復細。喬樹免  
斧斤。彩翠映日麗。僵者如巨蟠。舉首矯作勢。絕巔入遙  
矚。當初以里計。停步兀當前。鑿空瑤笄銳。蒼煙襯地橫。  
長風飄衣袂。棲真跡可尋。伊余有夙契。  
仙壇鐸響幽。咫尺勞攀陟。羊角風一吹。高寒凜相逼。鷹

峰勢欲飛。孤聳殊秀特。老松皆倒生。石壁千仞仄。溼嵐  
莽四圍。蒨翠慘無色。雨脚蹴林疾。衆嶂入昏黑。亂岫忽  
放晴。碧落淨如拭。洗出青芙蓉。朵朵擎天直。幾甸山低  
昂。眼中不遯匿。斷霞媚晚紅。須臾斜日昃。浩然發長詠。  
雲臥清奇極。諸妄都一消。下界群動息。

藐視界三千。舒嘯乘清旦。一望鋪海遙。浩浩無畔岸。颯  
地大風來。積陰初渙散。雲如秋水至。滾滾下江漢。五彩  
何陸離。晴日忽照爛。幻出金銀臺。寶光殊璀璨。山川脈  
絡明。掌上堪把玩。流峙終不移。丹碧錯相半。紅輪次第  
高。樹杪幽禽喚。的的露珠瑩。琪花香歷亂。欲測化工奇。

物象看屢換。俯仰趣合宜。心曠塵根斷。

念四歸家

時清行路莫言難。仍是歸家心自寬。賸得短長詩幾首。  
游蹤儘自卷中看。

續關西游草 終



